

Mengnaezhwng Ginhcouh:

“Yiuzbienq” Ronghlwenq Gwnzbiengz Mizmingz

钦州坭兴陶: 斑斓绚丽的“窑变”饮誉天下

□ Lij Cez



▲ Saeqsim gaekdeu dozveh.

◀ Aennaeh guhbaenz raemhdak hawq le cij oenqcoemh.



▲ Oenqcoemh ndei le caiq muz lwenq.



▲ Yunghsim yunghrengz guh aennaeh.



▲ Song cungj naez doxgyau lienh oemq.



▲ Baiz yiuzlungz ciuhgeq lij louzce.



▲ Seizneix aeu yiuzdienh oenqcoemh lo.

Mengnaezhwng Ginhcouh namh-niu daegbied, cienzbouh hongfwngz guh, dangzhong gyaqciq, aenmeng bienqvaq lai yiengh, youq yisuz dajcang baihneix yungh fap gaekdeu cienzdoengj, lizsij vwnzva daejrom nanwt, miz gij diindaej saedyungh, diindaej yawjngonz caeuq diindaej souyo gig ndei haenx. Bi 2008 dinfwngz oenqguh aenmeng (dinfwngz oenqguh mengnaezhwng Ginhcouh) ndaej lied haeuj buck daihngaih guckgya gaep feihvuzciz vwnzva yizcanj mingzloeg.

Dinfwngz oenqguh mengnaezhwng Ginhcouh dwg dinfwngz dangzhong fwngzguh cienzdoengj ranghdieng Ginhcouh Si. Ciuq Ginh-yen yenci geiq naeuz, aenmeng nyuenz dwg aennaeh, “hwng” couh dwg gij eiqsei haenggyaez seizhwng, “naezhwng” song cih gyoeb hwnj-daeuj, eiqsei de couh dwg gij aennaeh Ginhcouh vunz gwnzbiengz haenggyaez. Mengnaezhwng Ginhcouh cungj dinfwngz ndawbiengz cienzdoengj neix, gaenq miz 1300 lai bi lizsij, caeuq mengsa’ gyaemq Yiz-hingh Gyanghsuh, aenmeng Gensuij Yinznanz, aenmeng Yungzcangh Cungzging bingzbaiz heuhguh “seiq cungj aenmeng mizmingz Cungguk”. Dinfwngz guh aenmeng miz cungj gangjap “it oenq ngeih namh sam baenjguh” neix, oenqcoemh dwg hothoh ceiq youqgaenj. Guh mengnaezhwng miz aeu namh, dub namh, baenjguh aennaeh, baenzaen, cing-coih aennaeh, raemhdak, niemhyawj aennaeh, dajcang, oenqcoemh, niemhsouh aenmeng, muzlwenq doenghgij hongh neix. Mengnaezhwng Ginhcouh cawz miz caez gij daegdiemj aenmeng mizmingz wng le, lij gag miz gij daegdiemj bonjfaenh: It dwg aeu gij naezhau naezgyaemq baihdoeng baihsae song hamq Dah-ginhcouh guh yienzliuh, naez hamq-

doeng(naezhau) guh noh, naez hamqsae(naezgyaemq) guh ndok, ciuq beijlaeh doxgyaux ndei, hawj noh ndok doxdaemx cij suenq aen ndei; ngeih dwg dinfwngz gaekdeu dienz-bouj caeuq gij aenmeng wng mbouj doengz, mengnaezhwng Ginhcouh naezniu daegbied, namh saed saeq-naeh, seizbienth baenjbet, canghguh-meng ndaej cigciep youq gwnz aennaeh gaekdeu hotsei roxnaeuz veh dozveh, aeu gij fuengfap doeddeu, bingzdeu, sienqdeu, gyoengdeu daengj, gaekdeu baenz soujsei, fukveh bya raemx va roeg daengj ndeiawj, gig miz gij funggek begmiuz veh Cungguk, daj ndaw daengz rog sanq fat ok saekyiengh cienzdoengj deihfueng noengznwd; sam dwg yisuz “yiuzbienq” mengnaezhwng Ginhcouh youq hangz guhmeng ndaw guk raeuz caenh miz faenh dog, yisuz diyawj de gig sang. Mengnaezhwng aenvih gij namh de daiq miz liuhsaek, youq mwh baenjguh mbouj demgya gij liuhsaek aenmeng wng, aennaeh youq oenqcoemh seiz dohndat caeuq diegheiq bienqvaq mbouj doengz, cix fatseng yiengh “yiuzbienq”, okyiu muz lwenq gvet nyaq le, couh okyienh gij saek caeuq rizraiz ronghlwenq haenx, lumjbaenz doengzgeq, raizmbwn, heudiet, fwjgyaemq, raizguk

daengj rizraiz gagbaenz, cingqcaen dwg “ndaw feiz gouz bauj, nanz ndaej aen ndeu, ndaej aen haeuj fwngz, mbouj miz aen doengz” ha. Mengnaezhwng Ginhcouh aen cingqmaek de namh genq saeqnaeh, gij sing genqgywt, ndongjndat gietsaed, sing ndaekroq sekbyot, caeuq gij sing roq ngoemxcaem cungj meng wng mbouj doengz.

Mengnaezhwng Ginhcouh gai doh ndaw guk gak dieg caeuq Gangj Au Daiz doenghdieng neix, caemh gai bae daengz Dunghnanzya, Ouh Meij daengj 30 lai aen guckgya dem, gij aenmeng ndei ciuqgonq couh miz 20 lai aen guckgya gaep bozvuzgvany souyo. Ciuq gyoepsuenq mbouj caez, mengnaezhwng Ginhcouh aeu gij lizsij gyaenanz, dangzhong gaeuqgeq, yisuzsing sangvid de, gyawj bak bi daeuj youq gak aen gozci caeuq guckgya gaep hoihbaijlangh gwnzde gonqlaeng aeundaej 60 lai hangh daihciengj, ndawde bi 1915 doiq bingz bya raemx va roeg mengnaezhwng Ginhcouh soengq bae camgya aen Bahnazmaj Seiqgyaiq Bozlanjvei youq Meijgoz Giuginhsanh banh haenx dued ndaej gim-baizciengj, dwg Cungguk guh aenmeng lizsij gwnzde baez daih’it dued ndaej seiqgyaiq gaep gim-ciengj.



▲ Baenz dauq yunghdawz gwncaz caen yinx vunz.



▲ Aenmeng “yiuzbienq” le engq ndei yawj.